



Nuuk, 27. maj 2015

### **Inatsisartut suleriaasianni § 37 naapertorlugu Peqqinnissaqarfimmi meerartaarsinnaangitsut pillugit suliniutit pillugit apeqqutit makku Naalackersuisunut apuuppakka**

(Inatsisartunut ilaasortaq Aaja Chemnitz Larsen, Inuit Ataqatigiit)

#### **Apeqqutit:**

- 1) Siusinnerusukkut naappaateqarsimasut, soorlu ilumikkut (akussakkut) kræfteqarsimasut, naartulersinneqarnissaminnut qanoq periarfissaqarpat?
- 2) Suliassa qarfiup ineriartortinneqarnissaa pillugu Naalackersuisut sunik takorluugaqarpat?
- 3) Maannakkut periarfissarititaasut pitsanngorsarneqarnissaat siunertaralugu qanoq pilersaaruteqartoqarpa? Assersuutigalugu siornatigut kræftimik nappaateqarsimasut namminneq angalanermut, nerisaqarnermut najugaqarnermullu akiliisussaataapput – taanna Naalackersuisunit pissusissamisoortutut isigineqarpa?
- 4) Siunissami naartulersinneqartarnerup nunatsinni pisinnaalernissaa suliniutigineqarniarpa? Taamaappat taava qanoq iliortoqarniarpa aamma suliniutit suut aallartinneqareerpat?

#### **Tungavilersuut:**

Aaappariit namminneerlutik meerartaarsinnaangitsut, soorlu mannissaqarfimmigut kræfteqarsimaneq pissutigalugu imaluunniit allatigut timikkut ajoquteqarneq pissutigalugu, Rigshospitalimi naartulersinneqarsinnaapput akiligassap ilaanik akiliinermikkut. Soorlu aappariit namminneq meerartaarsinnaangitsut, naartulersinneqarnissamik periarfissaqartut akiliunneqarlutik, kisiannili angalanermut il.il., nerisaqarnermut najugaqarnermullu sivikinnerpaamik sapaatit akunnerini pingasuni Danmarkimiittariaqarnerminni, maani nunatsinni naartulersinneqarnissamik neqerooruteqannginnatta.

Nalunngilara taamatut naartulersitsisarneq (insemination) immikkut ilisimasaqarnissamik, atortorissaaruteqarnissamik immaqalu aamma immikkut ilinniarsimanissamik piumasaqaateqarfiusoq. Taamaakkaluartoq Naalackersuisut siusinnerusukkut kræftimik nappaateqarsimasut tamannalu pissutigalugu meerartaarsinnaangitsut, atugaasa pitsanngorsarnissaannik suliniuteqarumanersut tusarusuppara. Ullumikkut naartulerniarluni ataasiarluni suliaritinnermut 35.000 kr.-it missaat akiliutigineqartarput, amerlasuutigullu suliaritinnerit/misiliinerit pingasususarmata, aningaasartuutit 100.000 kr.-it missaaniikkajuttarput.

Apeqqutigisakka ilaqutariinnut nappaateqarsimaneq pissutigalugu meerartaarsinnaangitsunut tungapput. Assersuutigalugu nappaateqartoq Peqqinnissaqarfimmi katsorsartissimanini pissutigalugu naartusinnaajunnaarsimappat.

Apeqqutit ulluut suliffiusut qulit ingerlaneranni akeqquneqarput.